


214



Care

F


39

1326

1588.00

1588  
47-2035

2479



REQUESTE PRESEN-  
TEE AV ROY PAR MES-  
sieurs les Cardinaux , Princes  
Seigneurs , & les Deputéz de la  
ville de Paris & autres villes Ca-  
tholiques associéz & vnis pour  
la defence de la Religion Catho-  
lique Apostolique & Romaine.

**S**IRE,  
Mōsieur le Cardinal de Bour-  
bon & les autres Princes Ca-  
tholiques qui cognoissans la  
ruine en laquelle la Religion  
Chrestienne pouuoit tomber, s'vnirent en-  
semble pour supplier vostre Majesté d'ex-  
tirper les heresies de son Royaume, qui  
estoyent l'origine de tous noz maux passez,  
l'aliment des miseres presentes , & le mal-  
heur que nous auions à craindre pour l'ad-

A

THE NEWBERRY  
LIBRARY



2  
uenir: ont assez fait demonstration ius-  
ques à maintenant que leurs volôtez n'ont  
esté meües d'autre passion que du zele de  
l'honneur de Dieu & conseruation de son  
Eglise.

Et par ce que maintenant ils voyent que  
les grandes victoires qu'il a pleu à Dieu dô-  
ner à vostre Majesté, offrent vne tref-gran-  
de facilité pour arracher dès la racine ceste  
mauuaise plante d'heresie qui a fait naistre  
en ce Royaume, tât de dommageables re-  
jettons, ils persistent encores maintenant  
à luy faire ceste mesme tref-humble sup-  
plication de paracheuer ce saint œuure,  
l'effect duquel peut seul arrester le cours  
de toutes les partialitez & miseres qui me-  
nacent la ruyne de France.

Nous ne doutons point SIRE que ce ne  
soit vostre volonté & intention à laquelle  
nous voulons ioindre noz moyens, amis,  
biens, fortunes & generallyment tout ce  
qui en pourra dependre. Que si vostre  
Majesté estime, comme elle l'a tesmoigné,  
que Monsieur de Guyse y puisse estre utile.  
Il proteste deuant Dieu qu'il n'aura iamais  
plus de contentement que quand il se ver-  
ra si heureux qu'il puisse en vous faisant

seruice agreable, acquerir voz bonnes grâces, & plus encores en vne si iuste & sainte entreprise.

Mais d'autant que nous recognoissons quelques empeschemens qui peuuent non seulement trauerser vostre saint desir: Mais encores amener vn iour la subuersiō de la Religion Catholique, & del Estat de ce Royaume, Cōme tref-humbles & tref-fidelles subiects nous prendrōs la hardiesse de les luy descouurir. Car biē que le mal soit grād & que chacū le sente & en gemisse en son ame: si est-ce qu'il ne s'est trouué encores aucun particulier qui luy aye assez bien viuement représenté la principale origine du mescontentement de tous les subiects de ce Royaume, pour le mal plus grād qui semble trainer apres soy la ruyne del'Estat si bien tost il n'y est remedié.

Vostre Majesté doncques, SIRE, prendra en bōne part, s'il luy plaist, ce que nous dirons poussez seulemēt du zele que nous auons à son seruice, du bien de son Royaume & à la tranquillité de ses subiects.

Le Duc d'Espéron, SIRE, & le Sieur de la Vallette son frere, lesquels elle a esleués aux plus grandes charges & dignitez

de ce Royaume sont recogneus non seulement par la France, mais generally par toute la Chrestienté pour principaux fauteurs & support des heretiques.

Le voyage dudict Duc d'Espéron en Guyenne, les traictéz qu'il y fit, les cōseils qu'il donna, la faueur qu'il a cogneu leur estre affectionnez, la hayne qu'il a monstree auoir à tous les bōs Catholiques, mesmes à ceux qu'il a estimé fauoriser ceste cause, la participation qu'il a eue aux affaires que Cleruant negotioit pour les heretiques, la liberté qu'il a ouuert aux heretiques de Mets, les entreprises qu'il a faites sur Cambray ville appartenant à la Royne, le soupçon qu'il a donné de tous les gens de bien, l'assistance qu'il a prestée aux Reistres deffaits pour fauoriser leur retour & leur seruir descorte, Le conseil du trouble dernièrement aduenue à Paris les Parlements secrets qu'il a euz avec Chastillon, les deportemens de son frere, la prinse de Valée, Tallard, Guillestre & autres places qu'il a osté aux Catholiques de Dauphiné, la conniuece dont il a vŕse pour y auancer le pouuoir des heretiques par la destruction de ceste Prouince, & les



menées qu'il fit pour empescher la reddition d'Auflonne descouurent assez à quoy tendent leurs desseins.

Et quand il plaira à vostre Majesté que plus particulièrement on luy en face entendre les preuues avec le consentement general de tous ses subiects, Nous luy en représenterons plusieurs qui seroient trop longues à inserer en cest escrit, & que pour plusieurs bonnes raisons nous n'expliquons plus auant pour ceste heure.

Ceste commune opinion, SIRE, de l'intelligence que lesdicts Duc d'Espérnon & la Vallette ont avec les heretiques & la grandeur à laquelle il a plu à vostre Majesté les esleuer, faict craindre à vos bons subiects (principalement Catholiques) que si ils preuoyoient que vostre faueur vint vn iour à leur manquer (comme certainement il est impossible que leurs deportemens insolens puissent gueres plus long tēps estre supportables à vn si grād & si sage Roy) ne pouuans trouuer support entre les Catholiques, ils ne se iettassent entre les bras des heretiques, & transportassent avec eux toutes les Prouinces & places fortes qui sont en leur puissance en-

tre les mains de ceux avec lesquels ils ont des-ja vne si estroicte participation : de sorte que la France qui semble bien tost estre libre d'heresies , se verroit plus miserablement assubiectie à leurs dominations tyranniques qu'elle n'a iamais esté.

Outre cela, SIRE, qu'on les estime auteurs du desordre en tous les bons reiglements & police de France: Ils ont faiect vne hôteuse marchandise des Estats du Royaume, ils ont rauy & mis en leurs coffres toutes les Finances de France, & à peine tant de subsides ont peu saouler leur auarice, ils ont offensé les principaux Officiers de vostre Couronne & les plus speciaux seruiteurs de vostre Majesté, ils ont esloigné d'aupres d'elle beaucoup de ceux qui la pouuoient bien & sagement seruir, ils ne cessent iournellement de calomnier & mettre en soupçon vers elle les gens de bié qu'ils sçauét n'appreuuer leurs actions.

Que si quelques vns de ceux qui se sont seruiement assubiectis à eux veulent persuader à vostre Majesté que ce que nous luy proposons maintenant procede de quelque animosité ou inimitié particuliere que

nous ayons enuers eux, Nous la supplions tres-humblement. Premièrement d'en demander l'aduis à la Roync sa mere, qui par la prudence de laquelle elle a vsé au gouvernement de cest Estat, & le rang qu'elle tient, s'est acquise assez de puissance de parler franchement des choses qui touchent de si pres, & puis d'adiurer par le serment & deuoir que luy doibuent, les Princes, les Officiers de sa Couronne, les Seigneurs de son Cōseil, & les plus prudēs personages de son Royaume, de luy dire avec toute liberté ce qu'ils en sentent: & nous nous assurons qu'ayans par son cōmandement acquis telle liberté ils reietteront comme nous la cause des principaux mal-heurs de la France sur les desseins & deportemens de luy & de son frere, comme chacun d'eux le cognoist en soy & le confesse en particulier.

Cela fait que plus hardiment nous supplions vostre Majesté que recognoissant l'origine du mal que nous estimons que iusques icy elle a ignoré, il luy plaise les esloigner de sa personne & de sa faueur pour empescher que par cy apres ils ne puissent faire le mal que tous les bons



François & Catholiques craignent, en remettant ce qu'ils tiennent en la puissance des heretiques, & en ce faisant, les descharger de toutes les charges & Gouvernemens qu'ils tiennent en ce Royaume, sans les auoir aucunement meritez.

Et afin que quelques vns qui n'ont rien tant tasché que de nous rendre odieux, ne puissent dire que nous faisōs ceste requeste pous nous enrichir & auancer de leurs despoüilles. Nous protestons que nostre plus grand contentement sera quand nous les verrons despartis à ceux que vostre Majesté sçaura tres-bien iuger en estre dignes, & au merite desquels leur ambition les auoit ravis.

De cela SIRE, vostre Majesté tirera tāt d'honneur, vtilité & tranquillité pour son Royaume, que l'ayant bien consideré nous ne doutons point qu'elle ne se conforme en chose si iuste à la tres-humble Requeste & intention de noz bons subiects.

Premierement elle deliurera tout le peuple de la France, & principalement les Catholiques d'une tresgrande apprehension qui les trauailletant pour les deportemens,  
dudict



audiect Duc d'Espéron & de son frere  
que pour la crainte qu'ils ont qu'à l'aduenir  
leur grandeur ne soit l'auancement de la  
domination tyrânique de l'heresie, laquelle  
ils redoubtent tant, qu'ils aymeroyent  
mieux mourir que de la voir establie.

Après le contentement qu'elle aura dō-  
né à son peuple elle pourra sans doute  
poursuyure l'effect & heureux succez de  
ses victoires ja acquises contre les hereti-  
ques, & pour y commencer s'acheminer  
en Guyenne ou elle sera assistée de l'affec-  
tion plus grande de tous ses bons sub-  
iects Catholiques qui accroistront & leur  
volonté & leur courage quand ils verront  
les empeschemens qu'ils ont peu redoubter  
estre oïtez. Car chacun recognoist assez  
que ceste guerre ne se peut bien acheuer  
ainsi qu'il appartient tant que les forces  
principales de ce Royaume seront en la  
main d'un homme qui a si particuliere in-  
telligence avec vos ennemis, & qui se veut  
soubsvostre autorité rendre espouuenta-  
ble aux bons & tres-affectionnez Catho-  
liques.

Et pendant que vostre Majesté fera ce  
progrez en Guyenne pour maintenir vo-

stre ville de Paris & pourueoir aux choses necessaires pendant vostre absence, la Royne vostre mere qui par sa prudence s'y est acquise beaucoup de croyâce & amour du peuple, y tiendra les choses tres-tranquilles, & sçaura comme elle a fait cy-deuant en semblable occasion se seruir de personnes affectionnez au bien de vostre Estat.

Et parce que la Prouince de Daulphiné n'a pas moins de besoin que celle de Guyenne d'estre secourüe estant reduicte en vn estat tres-deplorable par les mauuais deportemens de la Vallette, & les secretes intelligences qu'il a eües avec les ennemis, Monsieur le Duc de Mayenne (s'il plaist à vostre Majesté luy en donner les moyens) luy seruira avec toute fidelité & affection qui se peut attendre d'un tres-humble seruiteur & subiect. Ce que nous proposons d'autant plus hardiment que nous sçauons que les Catholiques qui ont esté vne fois de-ja deliurez par luy d'une semblable seruitude, l'auront tres-agreable, voyre le requierent tres-instamment.

Et entre les plus grandes vtilitez que vostre Majesté pourra tirer les esloignant

de sa presence, ceste-cy ne fera pas des moindres qu'elle pourra, employant aux vtilitez vrgentes de son Estat, les grâds moyens qu'elle souloit donner pour entretenir leurs grandsurs, saouler leur avarice, achapter les places fortes de vostre Royaume, lesquelles ils marchandoyent toutes aux despës de voz Finances, elle aura plus de commodité de donner soulagement à ses subiects assez affligez d'ail-  
lieurs.

Et parce que la porte des subsidez nouueaux, qui est partie cause principale de la ruyne du peuple & de plusieurs grands desordres, a esté par eux ouuerte ou grandement eslargie, vostre Majesté ne desirer rien tant que le soulagement de son peuple, les ayans osté d'aupres d'elle, la pourra plus aysément fermer, remettant en vigueur les belles & anciennes Ordonnances de ce Royaume laissant la verification des Edicts nouueaux, & les remonstrances sur iceux aux Cours de Parlemēt & autres souueraines, abolissât l'vsage pernicieux des partis, deffendant l'acquiescement des dons sinon en fin d'annee. ostât du tout & sous griefues peines la supposition des nōs que l'on



a practiquez pour faciliter la verification des dons contre les anciennes Loix du Royaume, esteignant du tout la pratique des comptans. Bref ostât tous les abuz qui ont esté par eux introduicts ou augmentez à la ruyné du peuple, & preiudice de vostre service.

Et d'autant, SIRE, que les Catholiques de vostre Royaume ont tousiours grandement crainct que quelque iour ils ne vinsent à tomber sous la domination & puissance des heretiques, la tyrannie desquels par la misere de leurs voisins leur est effroyable & espouventable. Nous suppliõs tres-humblement vostre Majesté de les asseurer tant de ceste crainte que l'effect de la mauvaise volonté que les heretiques leurs fauteurs & adherans ont de se venger de ceux qui se sont opposez à leurs desseins remettant à vostre Majesté d'en rechercher les moyens sçachant que nul n'a plus de volonté & interest qu'elle, à la conservation de la Foy & Religion, & de ses bons subiects Catholiques.

Voyla, SIRE, ce que nous auons estimé digne de vous estre representé pour l'Estat general des affaires de la Religion Catho-



lique, & bien de vostre Eſtar. Vous ſuppliant auoir agreable ces tref-humbles remonſtrances qui ne procedent que du zele que nous auons à l'honneur de Dieu, au bien de vostre ſeruice & au repos & tranquillité de vos ſubieſts.

Pour ce qui concerne vostre bonne ville de Paris, SIRE, voz tref-humbles, tref-oùeſſans & tref-fidelles ſubieſts, les Bourgeois & habitans d'icelle & nous avec eux, outre ce que deſſus vous ſupplions en toute humilité que cōme leur fidelité enuers les Rois voz predeceſſeurs & vostre Majesté a esté assez de fois teſmoignée par memorables effects: Ainſi il vous plaiſe croire qu'en tout ce qui eſt paſſé ces derniers iours, ils n'ont iamais eu volonté ne intention de ſe departir de la vraye obeyſſance que les ſubieſts doiuent à leur Roy: la crainte ſeule de veoir inopinément & par voye inuſitée entrer de forces dans vostre ville, leur a faiſt prendre les armes par le cōmandement neantmoins de leurs Magiſtrats deſquels ils ont les Ordonnances par eſcript, nō pour aucun doute qu'ils euſſent de la bonté & iuſtice de vostre Majesté, mais d'autant que quelques perſon-

nes violentes auteurs & Conseilliers de ceste entreprise, abusant de vostre autorité ne voulussent attenter contre eux par voye extraordinaire, ce dont ils les auoyēt souuent menacez.

Mais ils ont reçu vn tref-grand regret, que ceux qui auoyent esté auteurs de ce conseil, & qui craignoient la iuste indignation du peuple, eux ayēt poussé vostre Majesté à sortir de ceste ville. D'autant que par là on leur aye osté le moyen de pouoir monstrier l'effect de leur bōne volonté & les tesmoignages qu'ils luy vouloyent dōner de leur obeyssance, lesquels ils continueront de rendre à l'aduenir.

Et bien que vostre Majesté reconnoisse assez par ce que dessus qu'il n'y a point de faute de leur part ny en effect ny en volonté (comme ils en sentent leurs consciences fort nettes) Si est-ce que si elle auoit reçu quelque desplaisir pour les choses passées, ils la supplient tref-humblement comme Prince tref-doux, qui est amateur de son peuple, oublier son mescontentement & les tenir comme ils ont tousiours esté & veulent demeurer pour ses tref-humbles & tref-fidelles seruiteurs & subiects.

Et parce qu'on luy a voulu cy deuant donner beaucoup de mauuaises impressions de leur fidelité, par faux & calomnieux rapports comme ils ont esprouué par effect, & que ce nouuel accident suruenu (malgré eux & à leur grād regret) a apporté beaucoup de nouveau subiect de deffiance, Voz tres-humbles & tres-obeyssants subiects les habitans de vostre ville de Paris, & nous avec eux, supplient tres-hūblemēt vostre Majesté leur dōner seur-té de pouuoir cy apres viure en tranquillité & repos sous son obeyssance, s'asseurant qu'elle en sçaura trop mieux trouuer les moyens qu'ils ne les pourroyent ny penser ny requerrir.

Et pour commencement ils la supplient auoir agreable que le Sieur d'O se deporté d'ores-nauant du maniement des affaires de la ville & commandement en icelle pour quelques raisons qu'ils aymēt mieux taire que publier si vostre Majesté ne leur commande.

Et par ce que les anciens Preuost des Marchands, Escheuins & Procureur de ladiète ville pour beaucoup de raisons que vostre Majesté peut entendre, ne pourroit



conseruer la ville au repos & vnion qui est  
requisse. Voz tres-humbles subiects les ha-  
bitans d'icelle vous supplient auoir agrea-  
ble la demissiō qu'ils ont faict de leur char-  
ge & l'eslection d'autres en leur place que  
le corps desdicts habitans ont faict pour  
deux ans, estimans qu'autrement la ville ne  
pouuoit estre disposee à la tranquillité que  
vostre Majesté le desire, & par mesme  
moyen authoriser ce que par eux a esté &  
sera faict & ordonné sous vostre autho-  
rité, pour le repos & assurance de ses bons  
subiects.

Et pour l'aduenir ils la supplient. SIRE,  
auoir agreable que les habitans de la ville  
puissent avec toute liberté & par les for-  
mes accoustumees eslire leurs Escheuins &  
Magistrats, qui sera le vray moyen de con-  
tenir ce peuple en vnion & repos, quand  
ses Magistrats auront esté choisis par eux.

Et d'autant que tous les monopoles &  
abuz qui se font es eslecciōs des Magistrats  
& autres Polices, de ladiete ville est nourrie  
& entretenue par la plus part des Officiers  
de ladiete ville qui entrent en leurs Offices  
par achapts, qu'ils en font notoirement au  
grand preiudice de vostre seruice & du biē  
de



de la dicte ville. Lesdicts habitans supplient  
vostre Majesté ordonner que vacations  
aduenant par mort ou forfaiture des-  
dicts offices, tant de Conseilliers de ville  
que Quarteniers & autres il y soit pourueu  
par eslection pour en iouyr par lesdicts  
esleuz durant deux ans, ou tel autre temps  
qu'il sera aduisé pour le mieux, & le temps  
expiré sera procedé aux nouuelles esle-  
ctions selon qu'en auez esté cy deuant re-  
quis par plusieurs fois.

Ceste ville, SIRE, qui est l'abord de toute  
la France s'est veüe par cy deuant fort in-  
comodee pour le passage des gës de guer-  
re, & seroit à craindre que cela continuant  
n'y apportast vne cherté de toutes choses  
necessaires à la vie, qui faiet que lesdicts ha-  
bitans supplient treshumblement vostre  
Majesté que quand il luy plaira retourner  
en ceste ville, dequoy ils aurõt vn extreme  
contentement, & vous en supplient tresh-  
humblemēt, elle aye agreable de n'y ame-  
ner, ne à douze lieües es enuirõs, autres for-  
ces que ses gardes ordinaires du corps par-  
ticulier, & leuāt des compagnies pour l'es-  
fect de la guerre les en tenir esloignees.

Auec ces deux moyens & autres que

vostre Majesté pourra mieux donner, elle  
 fera que lesdicts habitans de vostre ville de  
 Paris, reprendront leur assurance pour cō-  
 tinuer, cōme ils feront pour iamais, le ser-  
 uice & obeysfance qu'ils doiuent à vostre  
 Majesté, à la gloire de Dieu & au repos de  
 tous voz Subiects.

**FIN.**

